



Sco biaras autras societads ein era las Penticularas Breil Vuorz Andiastr SA stadas pertuccadas igl unviern vargau d'ina situaziun turbulenta caschunada dil coronavirus.

MAD

«Mitschai cun in egl blau»

Penticularas Breil Vuorz Andiastr SA fan gudogn malgrad corona

DA HANS HUONDER/FMR

■ **Miez mars ei la stagiun da skis passada vegnida terminada abrupt. Ils fastitgs dil coronavirus ein era da vesser el quen e rapport annual 2019/20 dallas Penticularas Breil Vuorz Andiastr SA. Tonaton sedat in gudogn el quen da menaschi.** «Ord vesta finanziaria essan nus mitschai cun in egl blau. Tgei consequenzas ch'ina tala pandemia ha igl avegnir, vegn per aunc a semussar. Seigi indrezs da far neiv ni corona: Tut quei sto vegnir purtau finanzielmeins e senza il sustegn d'investurs, cantun, vischnaunca e commerci sco era dalla populaziun, vegn quei buca ad esser pusseivel.» Quei

scriva il president dil cussegl d'administraziun dallas Penticularas Breil Vuorz Andiastr SA, *Markus Noser*, el rapport annual dalla societad. Ina tala situaziun difficila sco il mument sappien las penticularas surmuntar sulettameins sche tuts pertuccai tilien pil medem sughet.

Buna entschatta

Cun ina reit d'indrezs da producir neiv artificiala amplificada e bunas temperaturas han las Penticularas Breil Vuorz Andiastr SA saviu entscheiver puntualmeins la stagiun d'unviern passada. Suenter ils dis da fiasta sepresentavan cundiziuns optimalas ed ils 29 da december 2019 ein 4198 persunas stadas el terri-

tori da skis – aschi biaras sco aunc mai durent in di. Muort schliat'aura ha il territori da skis stuiu vegnir serraus cumpleinameins durent treis dis il fevrer ed ils 13 da mars 2020 han tuts indrezs e restaurants stuiu serrar pervia dil coronavirus. «Ina nova situaziun nunenconuschenta per tuts», puntuescha *Noser*. Enteifer paucs dis ein tutas lavurs necessarias per la fin d'ina stagiun vegnidas liquidadas cun risgurard dallas mesiras da protecciun. «Quei ei stau la fin dalla stagiun anticipada per 66 collaboraturs stagionals. Per els ed ils 13 collaboraturs stabels ei vegniu annunziat immediatameins lavur cuorta», scrivan il directur *Beat Zenklusen* ed il mei-

nafatschenta tecnic *Eugen Friberg* el rapport annual. Staus pertuccaus dalla situaziun ei era il Pradas Resort a Breil. Biaras reservaziuns seigien vegnidas stornadas. Ils 23 da mars 2020 ha era el stuiu serrar l'escha pervia dalla munconza da hospes.

Tonaton in gudogn

Il menaschi ei staus aviarts 88 enstagl da 111 dis. Il recav dil traffic ei serecucius sulettameins per 3,9 pertschien sin 4,1 milliuns francs. Tut en tut han las penticularas nudau 156 629 prementradas, 4,6 pertschien dameins e quei malgrad 21 pertschien dameins dis da menaschi. Las expensas per persunal han saviu ve-

gnir reducidas per rodund 300 000 francs sin 2,25 milliuns francs ed il cash flow munta la fin finala 953 000 francs. Quel ei per bunameins 200 000 francs me-gliers che quel digl onn avon. «Nus essan cuntents cul resultat contonschiu», scrivan ils exponents dallas penticularas. Las entradas totalas dalla societad importan 5,44 milliuns francs e las expensas totalas 4,36 milliuns francs. Il recav avon amortisaziuns, success finanziel e taglias munta 1,08 milliuns francs. La fin finala resulta in gudogn da biebein 12 000 francs. Il gudogn da bilanza importa pressapauc 863 000 francs grazia als 851 000 francs transferi igl onn precedent sil quen.

Sin viseta en claustra a Mustér

DA HANS HUONDER/FMR

■ **Biebein 40 commembras e commembres dalla Cuminonza dils possessurs da secundas habitaziuns da Tujetsch e dil Forum cultural Tujetsch han visitau la claustra da Mustér la sonda vargada. Pader Theo Theiler ha menau ils interessents atras las localitads.** Avon in onn han las duas organisaziuns envidau per l'emprema ga ad in scunter cultural comunabel. Sco quei che la presidenta dalla cuminonza, *Vreni Müller-Hemmi* se-regorda, ei quella sentupada stada en in plum in success. Rodund 60 persunas han visitau lu il Museum La Truaisch a Sedrun. La collaboraziun dallas duas organisaziuns ei vegnida cuntinuada ussa, visitond la claustra a Mustér. «La historia dalla claustra benedictina cun la baselgia gest renovada ha cattu grond interess», di *Vreni Müller-Hemmi*. Per motivs dil coronavirus ein ils interessents vegni menai en duas gruppas atras las localitads. L'entschatta ei vegnida fatga alla porta principala dalla claustra cun expectoraziuns da pader *Theo* davart la veta dils 19 muntgs, il menaschi naven dil sectur agricol ent-



Interessanta orientaziun da pader *Theo Theiler* en claustra a Mustér.

MAD

ochen il hotel da seminaris ed il gimnasi cun 146 scolaras e scolaras.

Sil viadi atras las localitads ha pader *Theo* orientau – magari era cun empau humor – las gruppas davart la liunga historia dalla claustra. Aschia ha ei dau in temps che la claustra haveva in sulet benedictin sco habitont. La baselgia barocca da s. Martin ch'ei gest renovada e che se presenta en bellezza tarlischur ei in bein cultral da muntada nazionala. En quei connex ha pader *Theo* fatg allusiun speciala digl altar da renaissance ella nav laterala. El ei vegniu construiv dil bab ed il fegl *Frosch da Feldkirch* ed ei in dils bials da sia specia en Svizra. Ils interessents han saviu prender investa da biars bials objects, denter auter la pli veglia plauna dalla Svizra. «Nus essan stai fetg impressuinai dall'excelenta orientaziun», di *Vreni Müller-Hemmi*. En num dallas gruppas ha *Markus Müller*, responsabel pils fatgs culturals tier la Cuminonza dils possessurs da secundas habitaziuns da Tujetsch, engraziu a pader *Theo*. Era per l'auter onn planiseschan la cuminonza ed il forum arranschaments culturals comunabels.

reclama

Sie sagen NEIN

- ✗ Bundesrat, National- und Ständerat
- ✗ CVP, FDP, SVP und GLP-Fraktion
- ✗ economieuisse, Arbeitgeberverband, Pensionskassenverband, Swissem, Swissmechanics, Versicherungsverband, SwissBanking
- ✗ Verband für Seniorenfragen
- ✗ Kantonale Industrie- und Handelskammern sowie kantonale Gewerbeverbände

Schweizer KMU und soziale Sicherheit gefährden?

Die GSoA-Initiative ist ein Angriff auf unsere KMU und die Unabhängigkeit der Nationalbank.

Zudem schadet das Finanzierungsverbot der AHV und den Pensionskassen. Zulasten unserer Renten!

www.GSoA-nein.ch

Am 29. November

NEIN

zum Finanzierungs-Verbot der GSoA

Komitee «NEIN zur GSoA-Initiative»